

Pa haci un cambio di ley riba libertad anticipa:

Minister Bikker lo presenta un concepto di ley na Ministerraad otro siman

ORANJESTAD (AAN) – Den conferencia di prensa extraordinario yama pa Minister mr. Andin Bikker, tocante e publicacionnan den prensa Diabierna mainta, relaciona cu un caso di intento di abuso sexual cu a keda den libertad causando disgusto den pueblo, e dignatario a subraya cu e semper ta busca solucion.

Ayera mainta el a papia di biaha cu Ministerio Publico y su colega den Gabinete, y a propone na nan cu otro siman e ta bin cu un concepto di ley pa haci cambio den e ley concerni cu ta concede e personanan den prison libertad anticipa.

E dignatario a menciona cu na Hulanda, for di unda Aruba su leyman ta deriva, no solamente nan a cambia e ley riba e tema menciona dos biaha, pero aworaki tin otro propuesta di ley cu Minister Dekker, encarga cu proteccion legal, a propone, unda basicamente e kier elimina e cumplimiento di 2/3 di

castigo pa sali den libertad.

Esaki ta rekeri si pa bin cu un edificio pa KIA nobo y mas amplio, pasobra na final di dia, cu 259 cupo no por yega na e capacidad pa alberga tur e personanan cu ta comete crimen, y mester amplie te minimo 300.

E mandatario a institui un task force cu ta trahado fuertemente riba esaki, pero e retonan semper ta keda e fondonan. Pesey semper e ta bisa cu e deseanan ta hopi pero e fondonan ta limita. Y pa bay traha un KIA nobo lo tuma basta miyon florin cu gobierno no ta dispone aworaki cu tin retonan grandi. Gobierno ta trahando pa solucion esaki diligentemente, pero no ta algo cu ta bay sosode di un dia pa otro y pesey e kier bin cu e cambio di ley.

Minister Bikker a subraya cu tambe tin un Ordenanza Penitenciaire Beginselen cu un persona por haya cas pa prison obligatorio sin cu e mag bay ningun otro caminda, e

por bisti un banchi electronico na su pols mientras e ta cumpli e tempo cu su castigo cu falta. E sistema aki ta yama electronic toezicht via cual por tin control riba e persona.

Otro siman e mandatario ta bay formula e Decreto Ministerial, y lo pone un plafond pa 2018, na espera di e cambionan di ley y tambe di e ley penitenciario cu por tin cas como prison. Minister Bikker a subraya cu, en todo caso, durante e resto di e aña aki lo no tin mas di persona cu lo bin na remarca pa sali mas tempran den libertad.

Tambe e persona reemplazante cu ta suppose di observa cierto maneho cu algun persona cu a comete crimen NO ta bin na remarca pa sali den libertad mas tempran y cu e no a aplica no obstante cu e ley no ta distingui, e dignatario a papia cu Ministerio Publico pa trece al tanto y recorde riba e maneho aki. E concepto di ley lo wordo manda otro siman pa Ministerraad.

Otro paso cu e mandatario a tuma y a papia di dje cu Ministerio Publico ta pa recorda e reemplazante cu ta observa e maneho y duna recomendacion na OM, pa aplica e maneho menciona, y tambe pa ora di manda e conseho pa e minister, e comision y OM mester ta completamente explicito kico e persona a comete.

Por ehemplo den e caso cu a pone bin cu e conferencia di prensa aki, e mandatario a reitera cu ta papia di intento di abuso sexual, pero no ta bisa cu tabata tin violacion.

E mandatario a menciona tambe cu el a mira cu na Hulanda no ta e Minister di Husticia ta sinta evalua e casonan aki mas pero nan a hacie un toots obhetivo, y por pensa den direccion cu kizas e mesun Corte cu ta duna e castigo, of Ministerio Publico, por haya e tarea di evalua si e persona por haya dos of tres luna prome cu caba e castigo, su libertad.

A base di articulo 37 di Codigo Civil y tambe un fout interno:

A laga persona cu a comete intento di abuso sexual den libertad

ORANJESTAD (AAN) – Minister di Husticia mr. Andin Bikker a convoca un conferencia di prensa extraordinario Diabierna mainta, pa trata e tema di Instituto Coreccional Aruba, KIA.

Pa cuminsa e mandatario a señala cu KIA, actualmente, ta sobrepoblada, locual no ta algo nobo, y desde cu el a bira minister e ta trenciendo esaki dilanti, y tambe cu un di su prioridatnan ta Aruba mester di un Instituto Coreccional nobo y mas amplio.

E dignatario a menciona cu na Bonaire, cu tin un poblacion di mas of menos 20 mil habitante, nan a traha un prison nobo cu 115 cel. Na Aruba e capacidad di KIA ta di mas of menos 260 cel den comparacion cu 115 mil habitante cu nos pais tin.

Apart di esaki KIA su edificio ta den un estado hopi deplorable, pasobra e minister anterior den ocho aña no a haci mucho na e facilidad aki.

E mandatario a señala cu danki Dios, e Institucionan di Aruba cu ta persigui crimen, tin un exito



di casi 90 por ciento, loke ta nifica cu mayoria di e casonan cu ta presenta ta wordo resolvi y esnan culpable ta wordo deteni y poni den prison.

Esaki ta haci cu Aruba su prison ta sobrepoblada, mientras cu den articulo 37 di nos Codigo Penal ta bisa cu ora cu tin un sobre poblacion den KIA tin e posibilidad cu esun cu haci su mes culpable di crimen, por keda den libertad un tiki mas tempran.

E mandatario a splica cu ora un persona ta wordo condena na un straf, normal ta cu ora tin dos tercer parti cu el a sinta su castigo

e ta wordo laga den libertad.

Minister mr. Bikker a indica cu den e caso specifico cu a sali den publicidad ayera, locual a presenta aworaki ta cu no solamente tin e sobre poblacion sino cu e 2/3 parti ta bin bao di presion, pero articulo 37 ta bisa cu hasta den e caso aki, tin e posibilidad pa laga bay e persona un tiki mas tempran.

Den e caso cu a sali den publicidad ta suppose cu e persona por a haya su libertad a base di e 2/3 parti ey di su castigo na fin di e cuminamento di December '17 cu Januari ultimo, y aworaki na Augustus el a wordo laga den libertad.

E mandatario a aclarea cu no ta Minister di Husticia ta trata e casonan aki sino cu pa cada un tin un Comision, den consideracion a base di recomendacion di Ministerio Publico y hopi biaha no ta haya datonan specifico.

Den e caso aki e persona a haci su mes culpable di intento di violacion, pero no ta wak ningun caminda cu ta un abuso sexual. Den e articulo 37 tampoco por lesa cu

ta haci distincion riba ki tipo di crimen a wordo cometi, gewoon ta bay na termino. Esaki ta wordo aplica ora e persona ta den haya su libertad.

Si tin un persona cu ta yegando su 2/3 parti di e castigo, y obhetiva y automaticamente den e sistema ta aparece cu e persona ey ta bin na remarca pa haya su libertad.

E mandatario a agrega cu tin un maneho cu e ta respeta, cu ta purba cu e personanan cu ta comete e sorto di delitonan aki no bin na remarca, pero e ley mes no ta haci e distincion aki.

Locual a pasa den e caso aki ta cu tin un reemplazante na KIA cu ta manda conseho pa Ministerio Publico, cu no tabata al tanto di e maneho aki y haci e recomendacion unda pa un fout interno no a cay riba esey. No obstante e minister a reitera, e ley mes no ta haci distincion.

E mandatario a señala cu esaki ta crea e discusion tambe di con un persona cu a comete un crimen ta bin na remarca y un hende cu, por ehemplo, a comete un atraco no.